

793—796

At nunc, carissime fili, frater, pater et amice, Deo gratias agamus assiduas pro omnibus bonis, quae nobis largitus est, te sanitati restituens et me gaudio perfundens. Facientes faciemus voluntatem illius, in quo solo salus est et vita indeficiensque felicitas. Hunc amemus, praedicemus et colamus, quia haec est vita aeterna. Igitur in carnali desiderio mundo vivere mors est, non vita. Sola tantummodo vera est vita vivere Deo, sicut ipse de se ait: 'Ego sum via, veritas et vita'; via, per quam itur, veritas, ad quam pervenitur, vita, in qua statur. Feliciter vivas, fili, frater, pater et amice in aeternum.

## 79.

*Alcvinus Aedilthydae abbatissae, quondam reginae, matri Aethelredi regis Northanhumborum, de muneribus missis gratias agit. Adhortationes addit. 793—796.*

*Codd. T fol. 54—55' (T\* fol. 30), Q fol. 120—121<sup>a</sup>.*

*Edd. Q 30, F 150, J 50. — Migne col. 471.*

DILECTISSIMAE IN CHRISTO SORORI AEDILTHYDE<sup>b 1</sup> MATRI HUMILIS LEVITA ALCHVINE<sup>c</sup> SALUTEM.

Vestrae benignitatis munera gratanter suscipiens, vestrae<sup>d</sup> dilectionis salutatoria verba libenter audiens, fateor magna me dulcedine esse gavisum; cognoscens fidelem in vestro pectore permansisse caritatem, quam nec terrarum longinquitas interrumpere poterit nec fluctivagi maris aestus procellosis undis obruere<sup>e</sup> valet, quominus ad me usque beneficosa munificentia pervolasset; sicut legitur: 'Aquaе multae<sup>f</sup> non potuerunt extinguere caritatem, nec flumina obruent illam'.

Igitur caritas, quae deseri potest, numquam vera fuit<sup>2</sup>. Nil<sup>g</sup> homines ita Deo adpropinquare facit sicut caritas. 'Qui in caritate manet, in Deo manet', sicut dicit scriptura; quia 'Deus caritas est'. De qua ipse Salvator ait: 'In his duobus praeceptis tota lex pendet et prophetae', id est in caritate Dei et proximi. Per caritatem proximi ad Dei dilectionem pervenitur. Dicit<sup>h</sup> enim Iohannes evangelista<sup>i</sup>: 'Si fratrem, quem vides<sup>k</sup>, non diligis, quomodo Deum, quem non vides, diligere potes?' Sed fraterna caritas in ammonitione spiritali<sup>l</sup> et in solatio saeculari ostendenda est. Sicut enim corpus cibo pascitur, ita anima sacris doctrinis alitur. Ideo utrumque facere debet qui potest et pauperi larga porrigere manu quod indiget et esurientem animam salutifera ammonitione reficere; maxime, qui praesunt aliis et multorum curam habere videntur. Debet<sup>m</sup> studiose vigilare pro singulis animabus, quasi rationem redditurus pro eis in die iudicii. Qui negligenter talentum servat acceptum<sup>n</sup>, poenam patietur suae negligentiae condignam; qui vero multiplicat diligenter pecuniam dominicam, magnam accepturus erit mercedem a domino Deo suo. Scire debent praelati, quod, quanto plus laborant in salute subiectorum suorum, tanto maiorem accepturi<sup>o</sup> erunt<sup>p</sup> gloriam; dicente in die iudicii<sup>q</sup> domino Deo illis: 'Euge, serve bone et fidelis,

79. <sup>a</sup>) Lemma: Item epistola ad Aedylthydae famulae Dei, olim reginae T; Incipit epistola ad Aediltridam famulam Dei, olim reginam Q. <sup>b</sup>) Ediltride Q. <sup>c</sup>) Alchvinus Q. <sup>d</sup>) vestrae — audiens om. Q. <sup>e</sup>) abruere T, Q. <sup>f</sup>) ductae T. <sup>g</sup>) Nil vel Q. <sup>h</sup>) Dicat T. <sup>i</sup>) euangelistae T. <sup>k</sup>) vidis T. <sup>l</sup>) spiritalia T. <sup>m</sup>) De hoc T; debet Q. <sup>n</sup>) acceptam T. <sup>o</sup>) accepti T. <sup>p</sup>) erint T. <sup>q</sup>) iudici in T.

1) quondam reginae, uxori Aethelwoldi Moll regis Northanhumborum (759—765), matri Aethilredi regis Northanhumborum (774—779 et 790—796); de qua v. Simeonis Dunelm. hist. reg. Angl. 762 (p. 42): Ethelwald rex — accepit reginam Etheldrytham Kal. Nov. in Cateracta. Haec igitur post obitum Aethelwoldi Moll (spatio annorum 765—774 mortui) monasterio cuidam praefecta abbatissa est; v. huius paginae not. a. 2) Hieronymi ep. 3, I, 13 ed. Vallarsius; cf. supra p. 49 n. 2; Paulini lib. exhort. ad Heiric. c. 7 (Opp. ed. Madrisius p. 24): Caritas, quae deseri potest, numquam vera fuit.